

Na osnovu člana 26. stava (2) Zakona o sportu („Službene novine Srednjobosanskog kantona“, broj: 8/05), ministar obrazovanja, nauke, mladih, kulture i sporta donosi

**PRAVILNIK  
O KATEGORIZACIJI SPORTAŠA  
I PRIZNAVANJU ZVANJA VRHUNSKI SPORTAŠ**

**I OPĆE ODREDBE**

Član 1.

**(Predmet)**

Ovim Pravilnikom utvrđuju se opća pravila za kategorizaciju sportaša, kategorije i kriteriji za kategorizaciju sportaša i priznavanju zvanja vrhunski sportaš, postupak kategorizacije sportaša, način sticanja i ostvarivanja prava koje sportaši mogu ostvariti na osnovu kategorizacije sportaša i način vođenja Registra kategoriziranih sportaša u Srednjobosanskom kantonu (u daljem tekstu: Kanton).

Član 2.

**(Područje primjene)**

(1) Odredbe ovog Pravilnika, jednako se primjenjuju na sistem sporta i parasporta, osim kada je drugačije propisano ovim Pravilnikom.

(2) Izrazi koji se koriste u ovom Pravilniku, a imaju rodno značenje, odnose se jednako na muški i ženski rod.

Član 3.

**(Nadležnost)**

Ministarstvo na osnovu ovog Pravilnika provodi postupak kategorizacije sportaša u Kantonu i donosi rješenja o kategorizaciji.

Član 4.

**(Definicije i izrazi)**

(1) Pod pojmom sport, podrazumijevaju se organizovane tjelesne aktivnosti i igre djece, mladeži i ostalih građana, zasnovane na načelima dobrovoljnosti i zainteresovanosti učesnika radi unapređivanja zdravlja, rekreacije, sportskih takmičenja, povećanja radnih sposobnosti i stvaranja navika za što pravilnije korištenje slobodnog vremena.

(2) Vrhunski sport je složena multidimenzionalna djelatnost koja provedbom različitih planskih i sistemskih procesa i aktivnosti ima za cilj postizanje vrhunskih sportskih rezultata na nivou Kantona, Federacije Bosne i Hercegovine, Bosne i Hercegovine i međunarodnom nivou.

(3) Sportaš, je lice registrovano pri odgovarajućem sportskom udruženju / klubu, za učešće na sportskim takmičenjima.

(4) Vrhunski sportaš je lice koje ostvaruje vrhunske rezultate na nivou Bosne i Hercegovine i međunarodnom nivou.

(5) Sportska ekipa je ekipa u ekipnim ili pojedinačnim sportovima, odnosno ekipa pojedinog kluba ekipnog ili pojedinačnog sporta u prvenstvu / kupu / ligi na nivou Bosne i Hercegovine ili na međunarodnom takmičenju, na kojem nastupa više od jednog sportiste.

(6) IOC - Međunarodni olimpijski odbor;

(7) IPC - Međunarodni paraolimpijski odbor;

(8) EYOF – Olimpijski festival Evropske mladeži;

(9) YOG – Olimpijske igre mladih;

(10) OO BiH – Olimpijski odbor Bosne i Hercegovine

(11) POO BiH - Paraolimpijski odbor Bosne i Hercegovine.

**II KATEGORIZACIJA SPORTAŠA**

Član 5.

**(Osnova za kategorizaciju sportaša)**

(1) Osnova za kategorizaciju sportaša je ostvareni vrhunski sportski rezultat ili poredak koji je sportaš pojedinačno ili kao član sportskog kluba ili sportske ekipe na nivou Bosne i Hercegovine ostvario na zvaničnim

takmičenjima međunarodnog nivoa ili na nivou Bosne i Hercegovine u sportovima koje su na programu olimpijskih ili paraolimpijskih igara i one koje priznaju Međunarodni olimpijski odbor (u daljnjem tekstu: IOC) ili Međunarodni paraolimpijski odbor (u daljnjem tekstu: IPC).

(2) Kategorizacija sportaša se primjenjuje u svim sportovima u kojima su krovni sportski savezi na nivou Bosne i Hercegovine upisani u Registar pravnih i fizičkih lica na nivou Bosne i Hercegovine.

(3) Sportski rezultat ili poredak koji sportaš ili sportska ekipa postigne na sportskom takmičenju na međunarodnom ili na nivou Bosne i Hercegovine može biti osnova za kategorizaciju pod uslovom da je nastup sportaša ili sportske ekipe na tom takmičenju organizovao ili odobrio nadležni sportski savez na nivou Bosne i Hercegovine.

#### Član 6.

##### **(Kriteriji za kategorizaciju sportaša)**

(1) Sportaši se razvrstavaju u pojedine kategorije na osnovu ispunjenja uslova utvrđenih ovim Pravilnikom i ostvarenih rezultata u skladu s Kriterijima kategorizacije sportaša (u daljnjem tekstu: Kriteriji) po pojedinim sportovima.

(2) Kriterije za kategorizaciju sportaša propisuje ministar uz obavljene konsultacije sa sportskim savezom, granskim sportskim savezima, olimpijskim odborom i drugim stručnim organima vodeći se interesima razvoju sporta i sportaša, koji će se donijeti u roku od trideset dana od dana stupanja na snagu ovog Pravilnika i isti će biti sastavni dio ovog Pravilnika.

(3) Osnovni kriterij za utvrđivanje kategorije sportaša je sportski rezultat, poredak odnosno plasman, rang-lista ili norma ostvorena na međunarodnom ili takmičenju na nivou Bosne i Hercegovine, zatim učešće u ekipi reprezentacije Bosne i Hercegovine na međunarodnom takmičenju organizovanom u sistemu zvaničnih međunarodnih sportskih federacija, te učešće u ekipi kluba na prvenstvu / ligi / kupu na nivou Bosne i Hercegovine.

(4) Prilikom izrade zvaničnih Kriterija uzimaju se u obzir sportski rezultati sportaša kao pojedinaca u pojedinačnim sportovima, zatim pojedinaca članova sportske ekipe u ekipnom sportu ili ekipnih rezultata u pojedinačnom ili ekipnom sportu.

(5) Kriteriji se primjenjuju kod sportaša pojedinca i njihovih sportskih rezultata u seniorskim, juniorskim i kadetskim kategorijama.

(6) Kriteriji se utvrđuju za sportove ili grane sporta čiji su sportski savezi na nivou Bosne i Hercegovine upisani u Registar pravnih i fizičkih lica na nivou Bosne i Hercegovine.

(7) U Kriterijima se uzimaju u obzir specifičnosti za rangiranje i ostvarivanje rezultata različitih sportova i disciplina u različitim sportovima.

#### Član 7.

##### **(Kategorije)**

(1) Na osnovu postignutih rezultata, sportaši se razvrstavaju u sljedeće kategorije:

Sportaš I kategorije – Zaslužni vrhunski sportaš;

Sportaš II kategorije – Vrhunski sportaš (visoki međunarodni nivo);

Sportaš III kategorije – Vrhunski sportaš (visoka BiH i viši međunarodni nivo);

Sportaš IV kategorije – Vrhunski sportaš (viša BiH i osnovni međunarodni nivo);

Sportaš V kategorije – Perspektivni sportaš.

(2) U slučaju da sportaš ostvari pravo na razvrstavanje po različitim osnovama (rezultat, poredak, norma, rang - lista), razvrstavanje se provodi po kriteriju koji je povoljniji za sportaša.

#### Član 8.

##### **(Uslovi za kategorizaciju sportaša)**

(1) Sportaši se razvrstavaju u pojedine kategorije na osnovu ispunjenja uslova utvrđenih ovim Pravilnikom i ostvarenja sportskog rezultata prema Kriterijima.

(2) Svaki sportaš, član kluba / udruženja / saveza koji je upisan u Registar sportskih klubova, sportskih saveza i sportskih stručnih zaposlenika Kantona, koji je ostvario jedan od sportskih rezultata prema odredbama člana 7. ovog Pravilnika i Kriterijima, ima pravo na kategorizaciju.

(3) Jedan od uslova za kategorizaciju sportaša prema ovom Pravilniku je ostvaren rezultat u seniorskim, juniorskim ili kadetskim kategorijama prema važećim pravilima koje propisuju međunarodne sportske federacije nadležne za određene sportove.

(4) Uslovi iz stava (3) ovog člana odnose se na broj sportaša / ekipa po disciplini u kojoj je sportaš nastupio, a ne na broj sportaša koji je nastupio ukupno na prvenstvu / ligi / kupu.

(5) Donja dobná granica za kategorizaciju sportaša prema ovom Pravilniku je 14 godina, a gornja zavisi od pravila koje za seniorske kategorije propisuju međunarodne sportske federacije za određene discipline po pojedinim sportovima.

(6) Za donju dobnu granicu navedenu u stavu (5) ovog člana u obzir se uzima navršenih 14 godina u kalendarskoj godini kada je sportaš ostvario rezultat.

(7) Za priznavanje rezultata na takmičenjima prihvata se jedan od sljedećih uslova:

a) da je takmičenje održano u sklopu olimpijskih ili paraolimpijskih igara,

b) da je takmičenje održano u sklopu prvenstva / kupa / lige ili igara organizovano pod okriljem zvaničnih svjetskih, kontinentalnih ili regionalnih međunarodnih federacija koje su u programu IOC ili IPC ili onih koje priznaju IOC ili IPC,

c) da je takmičenje održano u sklopu domaćeg prvenstva / kupa / lige na nivou Bosne i Hercegovine, te da je isto takmičenje organizovao sportski savez registrovan u Registru pravnih i fizičkih lica na nivou Bosne i Hercegovine.

(8) Uslovi za priznavanje rezultata po kategorijama:

a) za olimpijske igre, YOG i EYOF – bilo koji rezultat, odnosno nastup,

b) za svjetsko prvenstvo / kup / ligu – učešće sportaša / ekipa s najmanje 3 kontinenta i iz 15 državnih ekipa,

c) za kontinentalno prvenstvo / kup / ligu - učešće sportaša / ekipa iz najmanje 10 državnih ekipa,

d) za regionalno međunarodno prvenstvo / kup / ligu - učešće sportaša / ekipa iz najmanje 6 državnih ekipa,

e) za otvoreno državno prvenstvo / ligu / kup - učešće sportaša iz najmanje 3 državne ekipe-reprezentacije,

f) za prvenstvo / ligu/kup na nivou države Bosne i Hercegovine - učešće najmanje 8 sportaša / ekipa iz najmanje 5 klubova.

(9) Za paraolimpijske sportove i discipline, uslov za priznavanje rezultata u svim sistemima navedenim u prethodnom stavu ovog člana je nastup najmanje 3 takmičara iz 3 različite ekipe / kluba.

(10) Uslov za kategorizaciju može biti i ostvaren poredak na godišnjoj rang - listi na kraju takmičarske godine / sezone u slučaju da međunarodne sportske federacije vrednuju rezultate metodologijom godišnjeg / sezonskog rangiranja.

(11) Ako je prvenstvo / kup / ligu određenog sporta na nivou države Bosne i Hercegovine otvorenog (međunarodnog) tipa na kojem imaju pravo nastupiti takmičari drugih zemalja, priznaje se administrativno utvrđen rezultat ili poredak za određenu disciplinu ili kategoriju na način da se s rezultatske liste određene discipline i kategorije izdvoje rezultati ili poredak sportaša drugih zemalja, ukoliko je zadovoljen uslov naveden u stavu (6) ovog člana.

### III POSTUPAK ZA KATEGORIZACIJU SPORTAŠA

#### Član 9.

##### **(Koraci u postupku kategorizacije)**

(1) Postupak kategorizacije sportaša se provodi kroz sljedeće korake:

a) Sportaš popunjava propisani obrazac zahtjeva za kategorizaciju sportaša koji je sastavni dio ovog Pravilnika (Prilog 1) i isti s obavezanim pripadajućim prilozima predaje u matični klub;

b) Matični klub sportaša pregleda zahtjev s prilozima, dopunjava podatke i potrebnu dokumentaciju, ovjerava zahtjev, te dalje dokumentaciju predaje službenim putem u matični savez ili u Ministarstvo ukoliko za određenu granu sporta na nivou Kantona ne postoji nadležni sportski savez;

c) Nadležni sportski savez na nivou Kantona također dodatno pregleda zahtjev s prilozima i dopunjava podatke i potrebnu dokumentaciju, ovjerava zahtjev i službenim putem dostavlja kompletiran predmet u Ministarstvo;

d) Ministarstvo razmatra zahtjev s prilozima i u postupku u skladu s odredbama ovog Pravilnika utvrđuje kategoriju sportaša;

e) Na osnovu utvrđene kategorije, Ministarstvo izdaje rješenje o kategorizaciji sportaša;

f) Ministarstvo na adresu kategoriziranog sportaša poštom, te na ostale adrese navedene u članu 12. stava (5) ovog Pravilnika elektronskim putem dostavljaju rješenje o kategorizaciji sportaša.

(2) Zahtjev za kategorizaciju može se podnijeti tokom cijele kalendarske godine, a odnosi se na postignute rezultate u proteklih godinu dana u odnosu na datum podnošenja zahtjeva.

(3) Ako Ministarstvo utvrdi da zahtjev za razvrstavanje u pojedinu kategoriju ima određenih nedostataka u odnosu na odredbe ovog Pravilnika i/ili Kriterije za kategorizaciju određenog sporta, odnosno ako zahtjevu nisu priloženi odgovarajući dokazi navedeni u članu 10. stava (2) ovog Pravilnika, Ministarstvo će obavijestiti podnosioca zahtjeva o istom putem nadležnog sportskog saveza ili kluba, odrediti rok za otklanjanje nedostataka koji ne može biti kraći od 15, niti duži od 30 dana.

(4) U slučaju kada određeni elementi zahtjeva za kategorizaciju sportaša ukazuju na određenu dilemu, potrebu provjere ili tumačenja, Ministarstvo može u postupku zatražiti mišljenje ili dokaz nadležnog sportskog saveza ili kluba odnosno nadležnog sportskog saveza na nivou Bosne i Hercegovine.

## Član 10.

### (Podnošenje zahtjeva)

(1) Zahtjev za kategorizaciju sportaša, preko nadležnog sportskog saveza Kantona ili kluba, sportaš podnosi na obrascu koji je sastavni dio ovog Pravilnika (Obrazac – Prilog 1).

(2) Uz zahtjev iz stava (1) ovoga člana se prilažu:

a) kopija važeće licence nadležnog sportskog saveza na nivou Bosne i Hercegovine,

b) dokaz o postignutom rezultatu / plasmanu koji je osnova za kategorizaciju, ovjeren od strane nadležnog sportskog saveza na nivou Bosne i Hercegovine.

(3) Dokazom iz stava (2) tačka 2. ovoga člana smatra se zapisnik s takmičenja, službeni bilten ili zvanični rezultati međunarodnog sportskog saveza ili pripadajućeg sportskog saveza na nivou Bosne i Hercegovine.

(4) Dokument o rezultatu / plasmanu s takmičenja treba izričito i jasno sadržavati disciplinu i dobnu kategoriju u kojoj je ostvaren rezultat u skladu s kriterijem ili je uz navedeni dokument potrebno predložiti drugi dokument (npr. izvod iz propozicija takmičenja, pravilnika o sistemu takmičenja i sl.) iz kojeg je razvidna disciplina i dobna kategorija za koju ostvaren rezultat odgovara kriteriju za kategorizaciju sportaša.

(5) Zahtjev za kategorizaciju sportaša iz stava (1) ovoga člana mora biti potpisan od strane lica ovlaštenog za zastupanje sportskog kluba, odnosno nadležnog sportskog saveza Kantona, kojim se potvrđuju tačnost i ispravnost podataka.

## Član 11.

### (Postupci i status usljed nastanka vanrednih okolnosti)

(1) Sportaš koji tokom važenja rješenja o kategorizaciji sportaša promijeni klub, ukoliko se za to ukaže potreba, zahtjev za izmjene rješenja podnosi na obrascu koji je sastavni dio ovog Pravilnika (Obrazac – Prilog II).

(2) Zahtjevu iz stava (1) ovoga člana sportaš je dužan priložiti ispisnicu iz prethodnog i upisnicu (potvrdu o članstvu) u novi klub, na koji se traži izdavanje rješenja o kategorizaciji sportaša.

(3) Kategorizovani sportaš za vrijeme bolovanja, dugotrajne povrede, roditeljskog, roditeljskog, posvojiteljskog, skrbničkog ili udomiteljskog dopusta može ostvarivati prava na osnovu važećeg rješenja o kategorizaciji sportaša, a najduže godinu dana od dana važenja rješenja.

(4) Zahtjev iz stava (3) ovoga člana za produženje trajanja prava kategorizacije sportaša podnosi se na obrascu koji je sastavni dio ovog Pravilnika (Obrazac – Prilog III).

(5) Produženje trajanja prava sportaša radi okolnosti iz stava (3) ovoga člana, utvrđuje se slijedom podnesenog zahtjeva sportaša za ostvarenje tog prava, s priloženom dokumentacijom o bolesti odnosno sportskoj povredi (koja uključuje i mišljenje nadležnog liječnika), ili dokaznom dokumentacijom o roditeljskom, posvojiteljskom, skrbničkom ili udomiteljskom statusu.

(6) Sportaš kojem bude izrečena pravosnažna mjera zabrane takmičenja od strane evropske ili svjetske sportske federacije ili pravosnažna kazna zbog kršenja antidoping pravila ne može steći nikakvo pravo po ovom Pravilniku, odnosno prestaje mu trajno pravo stečeno primjenom odredbi ovog Pravilnika.

## Član 12.

### (Rješenje o kategorizaciji)

(1) Rješenje o kategorizaciji sportaša priprema i donosi Ministarstvo.

(2) Rješenje o kategorizaciji sportaša sadrži:

a) ime i prezime sportaša,

b) adresa sportaša,

c) datum i mjesto rođenja sportaša.

d) naziv sporta sportaša,

e) naziv kluba kojeg je sportaš član,

f) kategorija u koju se svrstava sportaš,

g) osnova za svrstavanje u kategoriju,

h) datum od kojeg vrijedi rješenje o kategorizaciji,

i) datum do kojeg vrijedi rješenje o kategorizaciji.

(3) Vremenski period na koji se odnosi rješenje je:

a) za sportaše I kategorije – 4 godine,

b) za sportaše II kategorije – 2 godine,

c) za sportaše III, IV i V kategorije – 1 godinu.

(4) Datum važenja rješenja odnosi se na prvi dan sljedećeg mjeseca nakon datuma kada je sportaš ostvario rezultat / plasman na osnovu kojeg stiče pravo na određenu kategoriju i traje do roka propisanog stavom (3) ovoga člana.

(5) Rješenje o kategorizaciji sportaša u određenu kategoriju Ministarstvo dostavlja poštom (preporučeno s povratnicom):

- a) kategorizovanom sportašu, te elektronskim putem na adrese navedene u zahtjevu,
- b) pripadajućem sportskom savezu Kantona,
- c) matičnom sportskom klubu za koji je sportaš registrovan,
- d) pripadajućim službama nadležnim za sport u općini / gradu.

#### Član 13.

##### **(Podnošenje i rješavanje žalbi na rješenje)**

- (1) Rješenje o kategorizaciji je akt protiv kojeg sportaš može podnijeti žalbu Ministarstvu, u roku od 15 dana od dana dostave rješenja.
- (2) Ministarstvo je obavezno u roku od 30 dana od dana zaprimanja žalbe donijeti rješenje na žalbu.
- (3) Rješenje Ministarstva je konačno i protiv njega se može pokrenuti upravni spor pred nadležnim sudom.

#### IV PRAVA KATEGORIZOVANIH SPORTAŠA

#### Član 14.

##### **(Oblici prava i vremenski okvir)**

- (1) Kategorizovani sportaš prema odredbama ovog Pravilnika može u Kantonu sticati i ostvarivati određena materijalna i druga prava.
- (2) Sva materijalna prava i naknade nosioca prava mogu se ostvariti samo putem posebnog rješenja koje donosi Ministarstvo, a koja se isplaćuju na osnovu odluke Vlade Kantona na prijedlog Ministarstva.
- (3) Druge pogodnosti i prednosti koje ima nosilac određene kategorije može ostvarivati i na način i putem kako to propisuje davalac prava i pogodnosti.
- (4) Kategorizovani sportaš može ostvarivati sva druga prava u skladu s propisima, a koja nisu u suprotnosti s Olimpijskom poveljom, Evropskom poveljom o sportu i propisima međunarodnih sportskih organizacija / federacija.
- (5) U skladu s odlukama / uredbama institucija, organizacija ili drugih pravnih lica koja omogućavaju ostvarenje prava, kategorizovani sportaš može ostvarivati dodijeljena prava iz Pravilnika potpuno, djelimično, ili pod posebnim uslovima.
- (6) Sportaš stiče prava iz ovog Pravilnika danom razvrstavanja u određenu kategoriju navedenu u rješenju, pod uslovom navedenim u članu 15. stava (2) ovog Pravilnika.

#### Član 15.

##### **(Sredstva)**

- (1) Sredstva za ostvarivanje prava iz stava (1) člana 14. ovog Pravilnika kategorizovani sportaš može u skladu s odlukama / uredbama ostvarivati preko:
  - a) Vlade Kantona,
  - b) gradskih i općinskih organa vlasti,
  - c) sportskih saveza Kantona i općina,
  - d) klubova i udruženja,
  - e) ostalih pravnih lica.
- (2) Navedene institucije, organizacije i ostala pravna lica iz stava (1) ovog člana osiguravaju sredstva u skladu sa zakonima, na osnovu odluka / uredbi, te mogućnostima u svojim godišnjim budžetima.

#### Član 16.

##### **(Osnove za sticanje ili gubitak prava)**

- (1) Kategorizovani sportaš može ostvarivati prava iz ovog Pravilnika samo pod uslovom da je uzorit sportaš, da uredno i redovno obavlja svoje sportske zadaće, ostvaruje program treninga, priprema i takmičenja, te izvršava obaveze prema reprezentaciji, ako ga za kandidata odnosno člana te ekipe odredi nadležni sportski savez na nivou Bosne i Hercegovine.
- (2) Kategorizovanom sportašu se može obustaviti ili ukinuti pravo utvrđeno ovim Pravilnika, ako bez opravdanih razloga odbije nastupiti za reprezentaciju Bosne i Hercegovine kada ga za kandidata ili člana te ekipe odredi sportski savez na nivou Bosne i Hercegovine, odnosno OO BiH ili POO BiH u slučaju takmičenja za koje su ove organizacije nadležne.
- (3) Kategorizovani sportaš gubi ostvarena prava iz ovog Pravilnika u slučajevima:
  - a) pozitivnog nalaza dopiñske kontrole u vrijeme ostvarivanja rezultata ili važnosti rješenja o kategorizaciji,
  - b) ako je pravomoćno osuđen za kazneno djelo za koje je izrećena kazna zatvora u trajanju dužem od godinu dana,

c) ako se naknadno utvrdi da dokumentacija za sticanje statusa kategorizovanog sportaša u skladu s odredbama člana 10. ovog Pravilnika nije bila istinita ili ima drugih bitnih smetnji za utvrđivanje statusa kategorizovanog sportaša.

(4) Sportaš mlađi od 18 godina može prava iz ovog Pravilnika ostvarivati preko roditelja ili staratelja.

## V REGISTAR KATEGORIZOVANIH SPORTAŠA NA NIVOU KANTONA

Član 17.

### **(Registar)**

(1) Registar kategorizovanih sportaša (u daljnjem tekstu: Registar) vodi se na osnovu člana 19. Zakona i odredbi ovog Pravilnika.

(2) Registar vodi Ministarstvo.

(3) Registar se vodi u elektronskom obliku, te se redovno ažurira na mjesečnoj bazi, svakog prvog radnog dana u mjesecu.

(4) Registar je javan, a objavljuje se na službenoj stranici Ministarstva.

Član 18.

### **(Sadržaj Registra)**

(1) Registar sadrži:

a) kategorija sportaša,

b) sport,

c) naziv sportskog saveza na nivou Bosne i Hercegovine,

d) ime i prezime sportaša,

e) matični klub / udruženje sportaša,

f) ostvaren rezultat - osnova za kategorizaciju,

g) datum od kojeg važi rješenje,

h) datum do kojeg važi rješenje.

## VI. PRIJELAZNE I ZAVRŠNE ODREDBE

Član 19.

### **(Tumačenje Pravilnika)**

Za tumačenje i nadzor primjene ovog Pravilnika nadležno je Ministarstvo.

Član 20.

### **(Važenje Pravilnika)**

Ovaj Pravilnik stupa na snagu osmog dana od dana objavljivanja u „Službenim novinama Srednjobosanskog kantona“.

Broj:01-34-529/26  
Datum: 24. marta 2026. god.  
Travnik

MINISTAR  
Bojan Domić, v. r.

**ZAHTJEV ZA KATEGORIZACIJU SPORTAŠA****I PODACI O SPORTAŠU**

1. Ime i prezime (dodatno ako ima i prezime prije zaključenja braka)	
2. Prezime prije zaključenja braka	
3. Ime jednog roditelja	
4. JMBG	
5. Dan, mjesec i godina rođenja	
6. Mjesto rođenja	6.a) Država
7. Državljanstvo	
8. Broj lične karte	8.a) Izdata od:
9. Prebivalište (ulica i broj, općina / grad)	
10. Adresa za slanje rješenja (ulica i broj, općina / grad)	
11. Broj mobilnog telefona	11.a) E-mail adresa
12. Status sportaša (zaokružiti) a) amater b) profesionalac	

**II PODACI O SPORTSKOJ PRIPADNOSTI**

13. Puni naziv kluba	13.a) E-mail adresa
14. Naziv državnog sportskog saveza	14.a) E-mail adresa
15. Pripadajuće kantonalno ministarstvo nadležno za sport	16.a) E-mail adresa
16. Pripadajuća općinska / gradska služba za sport	17.a) E-mail adresa

**III POSTIGNUTI REZULTAT ILI DRUGA OSNOVA ZA KATEGORIZACIJU**

18. Službeni naziv takmičenja	
19. Mjesto održavanja takmičenja	19.a) Država
20. Datum održavanja takmičenja (u ligaškim takmičenjima datum posljednjeg kola)	
21. Vrsta takmičenja (zaokružiti)	

a) Takmičenje pojedinaca Takmičenje ekipa Takmičenje ekipa s individualnim rezultatom		
22. Uzrast takmičara:		
a) Seniori Juniori Kadeti		
23. Rang takmičenja		
a) Olimpijske igre Svjetski Kontinentalni	b) Regionalni (Balkanski, Mediteranski, Alp-adria i sl.)	c) Otvoreni državni Državni
24. Rezultat (osnova za kategorizaciju)		
25. Ostali značajni podaci		

\*\*\*Napomena: Obrazac se obavezno popunjava elektronski, pri čemu je lice koje popunjava i ovjerava obrazac odgovorno za istinitost upisanih podataka.

Prilozi:

1. kopija lične karte,
2. kopija licence državnog sportskog saveza,
3. dokazna dokumentacija o rezultatu koji je osnova za kategorizovanje (zapisnik s takmičenja, službeni bilten međunarodnog ili državnog sportskog saveza ili OKBiH, POKBiH, SOBiH, kopija diplome, podaci sa službenih internetskih stranica međunarodnog ili državnog sportskog saveza).

Potpis sportaša

(za maloljetnog sportaša – roditelj ili skrbnik)

Podatke o ovom Zahtjevu ovjeravaju:

Za matični sportski klub:

Za državni sportski savez:

\_\_\_\_\_  
(naziv kluba)

\_\_\_\_\_  
(naziv saveza)

\_\_\_\_\_  
(funkcija)

\_\_\_\_\_  
(funkcija)

\_\_\_\_\_  
(ime i prezime)

\_\_\_\_\_  
(ime i prezime)

\_\_\_\_\_  
(potpis)

M.P.

\_\_\_\_\_  
(potpis)

M.P.

**ZAHTEJEV ZA IZMJENE RJEŠENJA  
O KATEGORIZACIJI SPORTAŠA  
ZBOG PROMJENE KLUBA**

**PODACI O SPORTAŠU**

1. Ime i prezime (dodatno ako ima i prezime prije zaključenja braka)
2. Broj rješenja o kategorizaciji

Prilozi:

1. popunjen Obrazac I s novim podacima
2. ispisnica iz dosadašnjeg kluba
3. upisnica u novi klub (ili potvrda o članstvu)

Napomena: Obrazac se obavezno popunjava elektronski, pri čemu je lice koje popunjava i lice koje ovjerava Obrazac odgovorno za istinitost upisanih podataka.

Datum: \_\_\_\_\_

Potpis sportaša

\_\_\_\_\_  
(za maloljetnog sportaša – roditelj ili skrbnik)Podatke o ovom Zahtjevu ovjeravaju:Za matični klub:Za državni sportski savez:\_\_\_\_\_  
(naziv kluba)\_\_\_\_\_  
(naziv saveza)\_\_\_\_\_  
(ime i prezime)\_\_\_\_\_  
(ime i prezime)\_\_\_\_\_  
(potpis) M.P.\_\_\_\_\_  
(potpis) M.P.

**ZAHTEJEV ZA PRODUŽENJE RJEŠENJA  
O KATEGORIZACIJI SPORTAŠA**

**PODACI O SPORTAŠU**

1. Ime i prezime (dodatno ako ima i prezime prije zaključenja braka)
2. Broj rješenja o kategorizaciji
3. Osnova za produženje rješenja o kategorizaciji
a) Bolovanje
b) Dugotrajna povreda
c) Rodiljni / roditeljski dopust / posvojiteljski / skrbnički ili udomiteljski dopust

Prilozi:

4. Dokazna dokumentacija  
(dokumentacija o bolesti odnosno sportskoj povredi koja uključuje i mišljenje nadležnog liječnika, ili dokumentacijom o roditeljskom, roditeljskom, posvojiteljskom, skrbničkom ili udomiteljskom statusu)

Napomena: Obrazac se obavezno popunjava elektronski, pri čemu je lice koje popunjava i lica koja ovjeravaju Obrazac odgovorna za istinitost upisanih podataka.

Datum: \_\_\_\_\_

Potpis sportaša

\_\_\_\_\_  
(za maloljetnog sportaša – roditelj ili skrbnik)

Podatke o ovom Zahtjevu ovjeravaju:Za matični klub:Za državni sportski savez:\_\_\_\_\_  
(naziv kluba)\_\_\_\_\_  
(naziv saveza)\_\_\_\_\_  
(ime i prezime)\_\_\_\_\_  
(ime i prezime)\_\_\_\_\_  
(potpis)

M.P.

\_\_\_\_\_  
(potpis)

M.P.